

# BOLETÍN SOBRE RESPONSABILIDADE SOCIAL DA Universidade de Vigo

DECEMBRO 2017

PUBLICACIÓN ELECTRÓNICA MENSUAL ELABORADA POLA UNIDADE DE ANÁLISES E PROGRAMAS

## DÚAS PERSOAS BENEFÍCIANSE DUNHA NOVA EDICIÓN DO PROGRAMA DE INTEGRACIÓN LABORAL E DISCAPACIDADE



**Rosa Tedín | Ourense**

“Promover a integración das persoas con discapacidade na sociedade e conseguir que adquiran unha experiencia no desenvolvemento de determinadas tarefas profesionais de cara a lograr a súa progresiva integración no mercado laboral e alcanzar así graos de autonomía e independencia persoal”. Con este obxectivo, a Universidade de Vigo vén de asinar un convenio coa Asociación de Persoas con Discapacidade de Ourense Ado para o desenvolvemento dun Programa de Integración Laboral de Persoas con Discapacidade. [+ info](#)

## O III CROSSFIT SOLIDARIO DOARÁ A SÚA RECADACIÓN Á FUNDACIÓN MENIÑOS



**Duvi | Pontevedra**

Definida pola combinación nun circuíto dunha ampla serie de exercicios de resistencia, forza, habilidade ou ximnásticos, o crossfit é unha modalidade deportiva de crecente popularidade que o vindeiro domingo 17 de decembro amosará a súa faciana máis solidaria no Pavillón Universitario. Por terceiro ano consecutivo, a Área de Benestar, Saúde e Deporte e Turoqua promoven, coa colaboración do Concello, un Crossfit Solidario, aberto á participación dun máximo de 50 persoas, que neste 2017 sumará

á doazón de alimentos non perecedeiros, roupa e xoguetes, unha cota de inscrición de 10 euros por parella, que serán doados integramente á Fundación Meniños pola infancia. [+ info](#)


## PREVENCIÓN DE INCENDIOS, XESTIÓN DO TRANSPORTE, HORTAS URBANAS E SERVIZOS DEPORTIVOS CENTRAN O IX CONGRESO DE TRABALLOS COLABORATIVOS



**M. DEL RÍO | VIGO**

O impacto da vaga de incendios do pasado mes de outubro chegou tamén ao Congreso de Traballos Colaborativos, unha iniciativa de docentes da Escola de Enxeñería Industrial que aposta pola metodoloxía Design Thinking para que estudantes de diferentes titulacións realicen e presenten proxectos conxuntos. Na presentación dos traballos realizados neste primeiro cuadrimestre por 144 estudantes dos diferentes graos de Enxeñería Industrial e de Ciencias Xurídicas e do Traballo a prevención e control dos lumes foi unha das temáticas dominantes, xunto coa xestión do tráfico e do aparcamento e a creación de horas urbanas. [+ info](#)

## UNHA APLICACIÓN PARA MELLORAR A EXPRESIÓN DAS PERSOAS CON AUTISMO NO ÁMBITO LABORAL, PREMIADA POR INDRA E FUNDACIÓN UNIVERSIA



**M<sup>a</sup> del Carmen Echevarría | Vigo**

Dotar ás persoas con Trastornos do Espectro Autista (TEA) na contorna laboral, dunha aplicación que lles permita practicar e autoavaliar a súa fala e escritura mediante pictogramas, grazas a un sistema de xeración de linguaxe natural, é o obxectivo de TalkAActive, unha App deseñada polo Grupo de Tecnoloxías da Información do Centro de investigación AtlantTIC da Universidade de Vigo, seleccionada na II Convocatoria de axudas a proxectos de investigación aplicada ao desenvolvemento de Tecnoloxías Accesibles, lanzada pola empresa Indra e a Fundación Universia. Xunto a TalkAActive, outros dos proxectos

das universidades de Málaga e Salamanca, foron elixidos na convocatoria, á que concorreron máis de 70 grupos de investigación de universidades públicas e privadas españolas, e que ten como obxectivo impulsar e apoiar economicamente o desenvolvemento de solucións tecnolóxicas punteiras que se traduzan en melloras tanxibles para persoas con discapacidade. [+ info](#)

## CASE 400 PÁXINAS PARA PASAR DAS PALABRAS AOS FEITOS NO EIDO DA IGUALDADE DE XÉNERO



**Rosa Tedín | Ourense**

*Mujer, Política e Igualdad. De las palabras a los hechos.* Con este título, vén de publicarse na editorial Tirant lo Blanch o libro electrónico que recolle as actas das *XII Xornadas Sociedade e Dereito*, celebradas do 28 de marzo ao 5 de abril de 2016 na Facultade de Dereito do campus de Ourense. A cita, e agora a súa publicación, reuniu a máis dunha vintena de expertos e expertas do ámbito político, social, cultural e académico para abordar como a igualdade formal non se traduce nunha igualdade real entre homes e mulleres.

## O 3DS REMATA COA PRESENTACIÓN DE PROXECTOS SOBRE RESIDUOS DA PESCA, XESTIÓN DE PARQUES NATURAIS, SINALIZACIÓN MARIÑA E ALGAS



**Duvi | Vigo**

Non se coñecían previamente, pero en 48 horas foron quen de poñer en marcha un equipo de traballo multidisciplinar e de desenvolver un proxecto empresarial emprendedor. En total 20 mozos e mozas de escolas e facultades de todas España participaron na terceira edición de *3DayStartup VigoMar*, organizado polo Campus do Mar, o Consello Social da Universidade de Vigo, Zona Franca de Vigo, a Consellería do Mar ou o Grupo de Acción Costeira A Guarda-ría de Vigo, e na que tamén colaboran numerosas entidades privadas. [+ info](#)



## UNHAS XORNADAS AFONDRARÁN NA VALORIZACIÓN DA ARTE RUPESTRE GALAICA



### Duvi | Ourense

"A extraordinaria abundancia e calidade da arte rupestre galaica suscita a necesidade de estudala, interpretala, conservala e divulgala como unha parte sobranceira da nosa memoria histórica e do noso patrimonio material". Con esta premisa, o Grupo de Estudos de Arqueoloxía, Antigüidade e Territorio Geaat da Universidade de Vigo organiza os días 14 e 15 de decembro, na Facultade de Historia do campus de Ourense, o ciclo de conferencias *No Limiar das Artes. Encrucillada de Tradicións Rupestres.* [+ info](#)

## 200 PROFESIONAIS E DOUS CENTROS QUE VISIBILIZAN NA SÚA DENOMINACIÓN O PAPEL DA MULLER NA CIENCIA



### M<sup>a</sup> del Carmen Echevarría e D.Besadío | Vigo

A primeira muller galega en licenciarse en Medicina en 1925 e en abrir unha consulta de xinecoloxía en Vigo, tres anos despois, dá nome desde hoxe ao edificio Cacti-Cinbio do campus vigués. Olimpia Valencia López foi ademais unha galeguista comprometida e unha precursora da igualdade de xénero, dúas condicións que este martes lle foron recoñecidas no acto de inauguración do edificio que acolle o Centro de Apoio Científico-Tecnolóxico á Investigación, Cacti, e o Centro de Investigacións Biomédicas, Cinbio, ademais do Servizo de Bioexperimentación. [+ info](#)

## AS BOLSAS OURENSE EXTERIOR TRAEN AO CAMPUS ALUMNADO DE BRASIL, ITALIA, CUBA, PANAMÁ E ARXENTINA



### Rosa Tedín | Ourense

No marco das actuacións para o fomento da internacionalización do campus de Ourense, cada ano véñense convocando as Bolsas Ourense Exterior, financiadas pola Universidade de Vigo, o Consello Social da Universidade de Vigo e a Deputación Provincial de Ourense. O seu obxectivo é facilitar a mobilidade de cidadáns residentes no estranxeiro que queiran cursar estudos de primeiro curso de mestrado nos centros e escolas deste campus. Este curso son cinco as estudantes que se teñen beneficiado delas e

que xa están incorporadas ás aulas ourensás. [+info](#)

## CRISTINA PATO COMPARTIRÁ PROTAGONISMO CO PERGAMIÑO VINDEL NUN ESPECIAL CONCERTO DE NADAL



**Duvi | Vigo**

No concerto de Nadal da Universidade de Vigo, que se celebrará o vindeiro 19 de decembro, os instrumentos musicais, as partituras e os acordes compartirán escena cos expertas e expertos no Pergamiño Vindel. O innovador espectáculo, que se desenvolverá a modo de “seminarración musicada”, integrará as intervencións de especialistas na obra de Martín Codax coa música de oito artistas e bandas, baixo da coordinación da gaitreira e pianista Cristina Pato, que exercerá de directora artística do concerto, que comezará ás 20.30 horas no Teatro Afundación de Vigo. [+ info](#)

## ESTUDANTES DE SETE PAÍSES FINALIZAN NO CAMPUS UN CURSO SOBRE LINGUA E CULTURA GALEGAS



**Duvi | Vigo**

Tres persoas chinesas, dúas alemás, unha estadounidense, unha cubana, unha finesa, unha francesa, dúas inglesas, unha polaca, unha ucraína e unha peruana. A Área de Normalización Lingüística volveu organizar un ano máis o Curso de Extensión Cultural de Lingua e Cultura Galegas, unha actividade que lle dá ao alumnado internacional a oportunidade de achegarse a Galicia, as súas paisaxes e as súas xentes. Arrancaron o pasado mes de setembro e rematan esta semana, na mochila levan algo

## UNIVERSIDADE E POLÍTICA SOCIAL ALÍANSE PARA POTENCIAR A FORMACIÓN DAS PERSOAS MAIORES



**Rosa Tedín | Ourense**

desenvolvemento persoal e social”. [+ info](#)

Este curso académico preto de 600 persoas maiores de 55 anos están matriculadas no Programa Universitario para Maiores nos tres campus da Universidade de Vigo. Co obxectivo de potenciar este ciclo formativo, este luns Salustiano Mato, reitor da Universidade de Vigo, e José Manuel Rey, conselleiro de Política Social da Xunta de Galicia, asinaron un convenio de cooperación que nace ante o compromiso das dúas institucións de dar resposta “á necesidade de crear e potenciar as actividades educativas, culturais e formativas que faciliten ás persoas maiores o seu



## O PROXECTO REPESCA\_PLAS RECOLLERÁ LIXO MARIÑO EN GALICIA E VALENCIA PARA ANALIZALO E VALORIZALO EN FORMA DE NOVOS PRODUTOS



**Duvi | Vigo**

A presenza de lixo en mares e océanos é un problema crecente que avanza paralelo ao desenvolvemento económico e industrial e afecta gravemente a ecosistemas tanto da fauna como da flora mariña, chegando incluso á cadea alimentaria. Unha parte moi visible desta contaminación corresponde a residuos plásticos que os consumidores non depositan nos puntos de recollida específicos e rematan no mar, chegando a crear grandes balsas de lixo flotando á deriva. De feito, segundo Greenpeace, os plásticos representan o 80% da

contaminación mariña. Para facer fronte a esta situación, o Instituto Tecnolóxico del Plástico (Aimplas), en colaboración coa Universidade de Vigo a través do grupo Ecotox, a Fundación Global Nature, a Asociación Vertidos Cero e a Cofradía de Pescadores de Gandía, puxo en marcha o proxecto Repesca\_Plas, que ten como obxectivo recoller lixo mariño en Galicia e Valencia para analizado e valorizalo en forma de novos produtos.

## OS MARTES SAUDABLES DESPIDEN O ANO LEMBRANDO A IMPORTANCIA DE APOSTAR POLOS BOS HÁBITOS DE VIDA



**Rosa Tedín | Ourense**

A Biblioteca Rosalía de Castro do campus de Ourense acolleu este martes a celebración da última sesión deste cuadrimestre dos Martes Saudables. Cos datos aínda por pechar, arredor de 300 membros da comunidade universitaria dos tres campus da Universidade de Vigo achegáronse aos postos desta iniciativa e revisaron os seus hábitos de vida de xeito integral, desde a nutrición á sexualidade. A esta cifra, engaden desde a organización, súmanse as numerosas consultas concretas realizadas por persoas interesadas en abordar algún aspecto específico da súa saúde ou hábitos. "O

noso balance é unha vez máis moi positivo", destaca Guillermo Santos, coordinador da Área de Saúde do campus de Ourense. [+ info](#)

## UN PROFESOR DE BBAA COORDINA A PRIMEIRA EXPOSICIÓN EN ESPAÑA DO ARQUIVO MUNDIAL DE ALBERT KAHN



**Eduardo Muñiz | Pontevedra**

Dun mercado de trigo en Damasco, ás oracións do venres na Gran Mesquita de Delhi, pasando polo retrato dun lama tibetano, un grupo de mulleres debullando millo en Serbia ou paisaxes e monumentos de Exipto, Xapón, Iraq ou Bulgaria. *Os Arquivos do Planeta*, impulsados a principios do pasado século polo filántropo francés Albert Kahn, constitúen un atlas gráfico do mundo, dirixido a deixar constancia do modo de vida, costumes, ritos e traballos das distintas sociedades e integrado por 72.000 documentos fotográficos e máis de 183.000 metros de película. Un arquivo que se exhibe por primeira vez en España no Círculo de Bellas Artes de Madrid, nunha exposición comisariada polo

profesor da Facultade de Belas Artes Alberto Ruiz de Samaniego xunto ao investigador e cineasta José Manuel Mouriño, na que presentan unha selección de 418 fotografías e unha escolma de 30 minutos de imaxes cinematográficas. [+ info](#)

## O DIRECTOR DO BIRKBECK SPORT BUSINESS CENTRE FALARÁ NO CAMPUS DE RESPONSABILIDADE SOCIAL CORPORATIVA NO DEPORTE

**Duvi | Ourense**



O Birkbeck Sport Business Centre é un centro de investigación da University of London que reúne a expertos e expertas internacionais en administración de deporte para realizar investigación de alta calidade neste eido. Por este motivo, asesoran a numerosas organizacións sobre xestión económica do deporte e son un referente para o sector. Este venres, a Facultade de Ciencias Empresariais e Turismo do campus de Ourense acolle unha conferencia do seu director e profesor Sean Hamil. [+info](#)

## PONTEVEDRA, UN GREEN CAMPUS CADA DÍA MÁIS SOSTIBLE

**Eduardo Muñiz | Pontevedra**



O impulso de medidas que promovan a sustentabilidade e o respecto ao medio ambiente é un dos compromisos que Pontevedra adquiriu co proxecto Green Campus, que o levou a converterse, en novembro de 2015, no primeiro campus de España coa bandeira verde coa que, a través da asociación ADEAC, a Foundation for Environmental Education (FEE) recoñece o seu labor en materia de educación e xestión ambiental. No marco dese proxecto e dese compromiso, a Vicerreitoría iniciou no curso 2015/2016 o proceso de substitución do gasóleo

polo gas natural como combustible a empregar nas calefaccións das diferentes facultades e escolas, proceso que na mañá deste xoves vén de completarse coa súa entrada en funcionamento na Escola de Enxeñaría Forestal. "Dentro da filosofía e dos plans de acción do Green Campus, pechamos un ciclo co que cumprimos outro paso máis no camiño cara ser un campus máis sostible e un campus que traballa e fomenta a eficiencia enerxética", salientou o vicerreitor Juan Manuel Corbacho dunha medida que permite reducir ás emisións de CO2 á atmosfera nun 20%. [+ info](#)

## DOUS DESTINOS E TRES POSIBLES ESCAPADAS Á NEVE

**Duvi | Vigo**



Un ano máis, chega o inverno, a neve e con eles as novas propostas deportivas da man da Área de Benestar, Saúde e Deporte, ESN Vigo e o [club Prado Surf](#). Como vén sendo habitual, propoñen tres viaxes a dúas estacións de montaña nas que a comunidade universitaria poderá practicar *snowboard* e esquí, ou simplemente divertirse na neve. Os interesados e interesadas deberán escoller a data e o destino da súa preferencia, entre as tres fins de semana que se ofrecen en xaneiro, febreiro e marzo nas estacións de Leitariegos e San Isidro, ubicadas na provincia de

León, en plena cordilleira cantábrica. [+ info](#)



## O MARATÓN SOLIDARIO DE ZUMBA REÚNE 200 QUILOS DE ALIMENTOS

**Duvi | Pontevedra**



Preto de 200 quilos de alimentos destinados a contribuír ao labor social que realiza en Pontevedra o comedor dos Pais Franciscanos é o balance do XV Maratón de Zumba Solidario, unha iniciativa que, na noite deste xoves, levou a preto de 70 persoas a suar, divertirse e moverse ao ritmo das diferentes coreografías, nunha iniciativa promovida pola Área de Benestar, Saúde e Deporte da Universidade de Vigo e a Vicerreitoría do campus destinada a unir actividade física e solidariedade. “Como soe pasar, a xente que acode implícase moito, como amosa a media de máis de dous quilos doados por persoa”, salienta o responsable da área no campus, Gustavo Loureiro, da participación nunha iniciativa aberta a toda a cidadanía, á que se lle pedía que doase cando menos un quilo de alimentos non perecedoiros para sumarse a este maratón. [+ info](#)

## O CROSSFIT ENCHEU DE SOLIDARIEDADE O PAVILLÓN UNIVERSITARIO

**Duvi | Pontevedra**



Co seu máximo de 50 prazas para participantes cuberto e con preto de 150 persoas como público, a terceira edición do Crossfit Solidario permitiu reunir, na tarde deste domingo, fondos e produtos cos que axudar ao labor de diferentes organizacións sociais. Organizado pola Área de Benestar, Saúde e Deporte da Universidade xunto con Crossfit Turoqua, o evento no que as 25 parellas participantes debían facer fronte nun circuío a unha serie de exercicios de resistencia, forza, habilidade ou ximnásticos, permitiu tamén reunir 250 euros, a través das cotas de inscrición, que serán destinados

de xeito integro á Fundación Meniños. Así mesmo, os xoguetes, roupa e alimentos doados tanto por participantes como por asistentes serán entregados á Fundación Boa Vida e a Cáritas. [+ info](#)

## O LABORATORIO DE FILOXENÓMICA PARTICIPARÁ NUNHA REDE INTERNACIONAL MARIE CURIE PARA A FORMACIÓN EN ONCOLOXÍA COMPUTACIONAL

**D. Besadío | Vigo**



O Laboratorio de Filoxenómica, liderado polo catedrático vigués David Posada e con sede no Cinbio–Centro de Investigación Biomédica da Universidade de Vigo-, participará a partir do vindeiro mes de xaneiro nunha rede internacional Marie Curie (ITN or Innovative Training Networks) para a formación de novos investigadores en oncoloxía computacional. Trátase dunha plataforma internacional conxunta que reúne investigadores de alto prestixio de diferentes países da Unión Europea, entre eles dous españois: o propio David Posada e Nuria López-Bigas,

do Instituto de Investigación Biomédica de Barcelona. [+ info](#)

## O ALUMNADO DO PROGRAMA UNIVERSITARIO PARA MAIORES PECHARÁ O ANO SUBINDO AO ESCENARIO



**Rosa Tedín | Ourense**

O ano 2017 está na súa recta final e o alumnado universitario tamén se suma á celebración deste fito antes do remate da actividade académica. Este xoves, día 21 de decembro, as persoas matriculadas no campus de Ourense no Programa Universitario para Maiores da Universidade de Vigo celebrará o seu xa tradicional Festival do Nadal, onde algúns dos seus membros subirán ao escenario para compartir a súa faciana máis artística. Será o broche de ouro a un ano que para este programa remata "moi positivamente", tal e como

destaca o seu responsable no campus de Ourense, Alberto Vaquero. [+ info](#)

## DE REGRESO A GALICIA CUNHA EXPERIENCIA DE MOBILIDADE INTERNACIONAL ENRIQUECENDO O CURRÍCULO



**Rosa Tedín | Ourense**

Case tres meses despois do seu arranque, a iniciativa Galeuropa Auce 2017 acaba de pechar a súa terceira edición. As doce persoas participantes xa retornaron a Galicia desde os seus destinos en Lisboa (Portugal) e Brescia (Italia) onde realizaron prácticas en entidades locais do eido social e educativo. A entidade organizadora, a Asociación Universitaria de Ciencias da Educación do campus de Ourense Auce, fai un balance moi positivo dos resultados acadados, destacando as oportunidades de inserción laboral que lle abre aos participantes vivir esta experiencia de mobilidade internacional. [+info](#)

## O ALUMNADO SÉNIOR CONCIÉNCIASE DO VALOR DE PROTEXER OS SEUS DATOS NA REDE



**Eduardo Muñiz | Pontevedra**

Concienciar respecto da necesidade de adoptar "actitudes preventivas que eviten o mal uso ou o uso indebido de datos persoais" e contribuír así a fomentar unha certa "cultura de protección de datos" nuns tempos nos que a presenza de información de todo tipo na rede "trouxo consigo unha nova problemática que afecta á confidencialidade e á privacidade individual". Este era, como sinala José María Fernández, presidente da asociación de alumnado sénior do campus, Asaexs, o propósito central da actividade que, coa colaboración da

Vicerreitoría, este colectivo promoveu este martes na Casa das Campás. O profesor da Área de Ciencia Política e da Administración da Universidade Celso Cancela e o consultor público Gregorio Andiön foron os protagonistas dun coloquio dirixido a achegar ás persoas asistentes as ferramentas normativas existentes para xestionar a súa información persoal. [+ info](#)



## 20.000 EUROS COS QUE SEGUIR ESPALLANDO A CULTURA DA IGUALDADE DE XÉNERO ENTRE AS NOVAS XERACIÓNS

**D. Besadío | Vigo**



Xornadas, conferencias, mesas redondas, ligas de debate, exposicións, ciclos de cine, concursos, talleres de lectura... o único requisito é que sexan actividades que promovan a perspectiva de xénero e que estean dirixidas ao alumnado de calquera área de coñecemento da Universidade de Vigo. A Unidade de Igualdade acaba de facer pública a convocatoria do ano 2018 das axudas para a organización de actividades docentes que promovan a igualdade de xénero, dirixidas a todo o corpo docente e que poden solicitarse ata o vindeiro 8 de xaneiro. [+ info](#)

## OS ONDAS SONORAS DO PERGAMIÑO VINDEL INSPIRAN O NADAL UNIVERSITARIO

**M. Del Río | Vigo**



Se o Pergamiño Vindel é o absoluto protagonista deste curso universitario, non o podía ser menos no Nadal. Da man de Cristina Pato, encargada de recuperar a súa historia e convertela nunha viaxe sonora, as cantigas de Martin Codax foron o eixo central arredor do cal xirou o Concerto de Nadal da Universidade de Vigo, que este martes encheu todas as butacas do Teatro Afundación. [+ info](#)

## AS EXPOSICIÓNS 'SEN MOLDES' E 'PRIMEIRA LIÑA' PECHAN O OUTONO FOTOGRÁFICO NO CAMPUS

**Duvi | Ourense**



*Sen moldes*, comentarios fotográficos sobre os xéneros e *Primeira liña* son as dúas últimas exposicións coas que o campus de Ourense participa este ano na 35 edición do Outono Fotográfico que se está a celebrar en diferentes puntos da xeografía galega e lusa. Nelas estudantes ou titulados da Facultade de Belas Artes de Pontevedra afondan desde un punto de vista crítico na sexualidade e na "marbellización" do litoral galego. Con estas dúas mostras son sete as exposicións celebradas nas instalacións universitarias no marco deste Outono Fotográfico.